

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj 7/10 i 3/23), člana 3. stav (3) Uredbe o osnivanju Ureda za borbu protiv korupcije Zeničko-dobojskog kantona („Službene novine Zeničko-dobojskog kantona“, broj: 5/22), na prijedlog Ureda za borbu protiv korupcije, Vlada Zeničko-dobojskog kantona, na 36. sjednici, održanoj dana 19.09.2023. godine, d o n o s i

ODLUKU

o Registru imenovanih lica u Zeničko-dobojskom kantonu

Član 1.

(Predmet regulisanja)

Ovom odlukom propisuje se način vođenja Registra imenovanih lica u Zeničko-dobojskom kantonu (u daljem tekstu: Registar), obaveza unosa podataka, obim i mjera obrade podataka, vremenski period obrade podataka, odgovornost za autentičnost i tačnost podataka, rokovi unosa i brisanja podataka i uređuju druga pitanja koja se odnose na Registar.

Član 2.

(Primjena Odluke)

(1) Ovu odluku dužni su primjenjivati svi organi uprave, upravne organizacije i službe, zavodi, agencije, direkcije, pravna lica s javnim ovlaštenjima Zeničko-dobojskog kantona (u daljem tekstu: Kanton), javne ustanove i javna preduzeća čiji je osnivač Kanton, te privredna društva u kojima Kanton učestvuje kao osnivač ili ima osnivačka prava sa procentom učešća najmanje 50% (u daljem tekstu: organi i institucije).

(2) U Registar se evidentiraju podaci o imenovanim licima koja obavljaju sljedeće javne funkcije u organima i institucijama i to:

- a) ministar, direktor, izvršni direktor, pomoćnici, zamjenik direktora i druga lica koja su imenovana na osnovu zakona, osnivačkog akta i drugog pravnog propisa i ovlaštena za predstavljanje i zastupanje organa i institucije,
- b) predsjednik i članovi skupština, upravnih i nadzornih odbora, odbora za reviziju, školskih odbora, i drugih upravljačkih struktura,
- c) predsjednik i članovi komisija, savjeta i drugih imenovanih radnih tijela i radnih tijela koja obrazuje Vlada Zeničko-dobojskog kantona, ministarstva i druga tijela kantonalnih organa uprave.

Član 3.

(Svrha uspostavljanja Registra)

Registar služi kao jedinstvena evidencija podataka o imenovanim licima u organima i institucijama koji obnašaju javne funkcije, a u svrhu prevencije mogućih pojava sukoba interesa.

Član 4.

(Uspostava i vođenje Registra)

(1) Ured za borbu protiv korupcije Zeničko-dobojskog kantona (u daljem tekstu: Ured) je nadležan za uspostavu i vođenje Registra, na osnovu podataka o imenovanim licima koje mu dostave organi i institucije.

(2) Organi i institucije dostavljaju podatke o imenovanim licima Uredu radi unosa u Registar, do uspostave neposrednog načina unosa podataka o imenovanim licima od strane organa i

institucije u kojima je izvršeno imenovanje putem ovlaštenih osoba.

(3) Upravljanje Registrom, praćenje rokova za dostavu i brisanje podataka, reagovanje prema organima i institucijama u slučaju nepoštivanja ove odluke u bilo kom segmentu u nadležnosti je Ureda.

(4) Tehničko uputstvo za unos podataka u Registar izrađuje Ured i čini ga dostupnim putem informacionog ili drugog sistema Ureda.

Član 5.

(Sadržaj Registra)

(1) Svi organi i institucije dostavljaju Uredu radi unosa (evidentiranja) u Registar sljedeće podatke o imenovanim licima:

- a) ime i prezime,
- b) funkcija imenovanja,
- c) naziv organa i institucije u koju je izvršeno imenovanje,
- d) sjedište organa i institucije u koju je izvršeno imenovanje,
- e) datum početka obnašanja imenovane funkcije,
- f) datum kraja obnašanja imenovane funkcije,
- g) da li je predviđena naknada za obnašanje imenovane funkcije (Da/Ne),
- h) iznos naknade,
- i) vrsta naknade (jednokratna, mjesečna, tromjesečna, kvartalno, godišnja, po predmetu, kandidatu, učinku, sjednici i dr.)
- j) naziv poslodavca,
- k) naziv radnog mjesta kod poslodavca kod kojeg je lice zaposleno,
- l) stručna sprema,
- m) status i struktura vlasništva pravnog lica u kojem je zaposleno,
- n) saglasnost rukovodioca u slučajevima predviđenim zakonom i drugim propisom,
- o) ukupan broj funkcija na koje je imenovano,
- p) da li postoji izjava da nije u sukobu interesa u organu i instituciji u kojoj obnaša imenovanu funkciju, ako je obavezna u skladu sa zakonom i drugim propisima.

(2) U slučaju da imenovano lice, po isteku perioda iz stava (1) tačka f) ovog člana nastavi obnašati funkciju, a o tome ne bude donesena posebna odluka/rješenje koja bi podlijeerala unosu podataka u Registar, organ i institucija je dužna odmah, a najkasnije u roku od sedam dana od datuma kraja obnašanja funkcije u pisanoj formi obavijestiti Ured o navedenom.

Član 6.

(Obaveza unosa podataka)

(1) Podatke iz člana 5. ove odluke u Registar unose uposlenici Ureda, koji imaju posebne korisničke šifre za unos, u skladu sa odredbama ove odluke i na način predviđen Odlukom.

(2) Organi i institucije dužni su imenovati ovlaštene i odgovorne osobe za dostavu podataka za Registar i praćenje njihove tačnosti, u roku od 30 dana od dana stupanja na snagu ove odluke.

(3) Nakon potpune uspostave neposrednog načina unosa podataka, ovlaštenim licima iz stava (2) ovog člana dodjeljuju se posebne korisničke šifre za neposredan unos podataka u Registar.

(4) Početnu dostavu podataka Uredu o svim imenovanim licima, organi i institucije vrše na obrascu koji propisuje Sekretar Ureda, u roku 30 dana od dana donošenja tehničke dokumentacije.

(5) Sve buduće promjene, organi i institucije dužni su, u roku od deset dana od dana izvršenog imenovanja, dostaviti Uredu podatke navedene u članu 5. stav (1) ove odluke, na službeni e-mail Uredu, zajedno sa aktima (rješenje, odluka ili drugi akt) kojim se dokazuje datum početka i kraja obnašanja imenovane funkcije, a ukoliko imenovanje vrši drugi organ u roku od 15 dana od dana dostavljanja akta o imenovanju organu i instituciji, a sve do uspostave neposrednog načina unosa.

(6) Nakon uspostave neposrednog načina unosa podataka u Registar, ovlaštene osobe u Registar unose podatke o imenovanim licima u roku od deset dana, od dana izvršenog imenovanja.

(7) Organi i institucije dostavljaju Uredu akte iz člana 5. stav (1) tačke n) i p).

Član 7. **(Obim i mjera obrade)**

Podaci o imenovanim licima mogu se obrađivati u obimu i mjeri koji je neophodan za ostvarenje svrhe iz člana 3. ove odluke.

Član 8. **(Vremenski period obrade)**

(1) Podaci o imenovanim licima obrađuju se za vrijeme trajanja perioda imenovanja, odnosno godinu dana nakon isteka perioda imenovanja, razrješenja, odstupanja sa imenovane funkcije ili drugog načina prestanka obnašanja imenovane funkcije.

(2) U slučaju da imenovano lice, bez donošenja posebne odluke/rješenja, ostane na imenovanoj funkciji nakon isteka perioda imenovanja, podaci će se obrađivati za period faktičkog obnašanja imenovane funkcije i godinu dana računajući od dana odstupanja sa imenovane funkcije.

(3) Period obrade podataka može se mijenjati u slučaju da se promijene zakonski ili podzakonski propisi koji tretiraju predmetnu oblast.

Član 9. **(Autentičnost i tačnost unesenih podataka)**

(1) Za autentičnost i tačnost Uredu dostavljenih, a nakon uspostave neposrednog načina unosa, unesenih podataka o imenovanim licima, odgovorni su organi i institucije u kojima je izvršeno imenovanje.

(2) O pogrešno ili netačno dostavljenim podacima za unos u Registar, organi i institucije dužni su obavijestiti Ured odmah, a najkasnije sedam dana po saznanju, te u istom roku ispravljene dostaviti Uredu.

Član 10. **(Izmjena, čuvanje i korištenje podataka)**

(1) Ured vrši obradu svih prikupljenih podataka koje dostave organi i institucije i javno objavljuje na web stranici www.zdk.ba ili za ove svrhe zakupljenoj posebnoj domeni.

(2) Svaka izmjena unesenih podataka može se vršiti na osnovu pismenog zahtjeva organa i institucije.

(3) Podaci koji se u Registar unose na način predviđen u članu 4. ove odluke čuvaju se i štite u skladu sa posebnim propisima.

Član 11. **(Osiguranje uslova za vođenje Registra)**

Rukovodilac organa i institucije odgovoran je za osiguranje potrebnih kadrovskih i tehničkih uslova za dostavu podataka, a nakon uspostave neposrednog načina unosa podataka o imenovanim licima od ovlaštenih osoba organa i institucija i za unos u Registar.

Član 12. **(Tehničke i normative pretpostavke realizacije Odluke)**

Sekretar Ureda u roku od 60 dana od dana stupanja na snagu ove odluke donosi tehničku dokumentaciju.

Član 13. **(Nadzor nad primjenom Odluke)**

(1) Nepostupanje po odredbama ove odluke predstavlja povredu službene dužnosti.

(2) Nadzor nad primjenom ove odluke vrši Ured.

Član 14.

(Provođenje Odluke u jedinicama lokalne samouprave)

(1) Preporučuje se općinama i gradovima na teritoriji Kantona da pristupe ovoj odluci, radi uspostave transparentnog, centralizovanog, kvalitetnog i učinkovitog sistema smanjenja rizika u upravljanju sukoba interesa u javnom sektoru na teritoriji Kantona.

(2) Pristupanje se vrši donošenjem odluke od strane načelnika, odnosno gradonačelnika, koja sadrži ovlaštenje Uredu za obradu podataka koji su predmet ove odluke, a koja se dostavlja Uredu.

Član 15.

(Stupanje na snagu Odluke)

Ova odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

PREMIJER

Amra Mehmedić

Broj: 02-04-14356/23

Datum, 19.09.2023. godine

Z e n i c a

DOSTAVLJENO:

1x Ured za borbu protiv korupcije,

1x Svim kantonalnim ministarstvima i drugim tijelima kantonalne uprave,

1x Svim institucijama, putem resornih ministarstava,

1x svim jedinicama lokalne samouprave u Zeničko-dobojskom kantonu,
putem Ureda,

1x Stručna služba Vlade – web stranica Zeničko-dobojskog kantona,

1x „Službene novine Zeničko-dobojskog kantona“,

1x a/a.